

Leabhar -Latha Mhgr. Ailein Domhnallaich

Bha tàirneanaich ann feasgar, ach cha robh e ro-ghoirid a làimh. Bha corra mheall de dh' uisge trom reamhar dhith mu'n am, ach 's e latha balbh socair a rinn i. Bha strùladh gu leòir as a' mhuir.

Thug mi làmh air corra mhearachd facail a bha sgrìobhte anns an t-seanchas aig Miss Freer mu na Lochlannaich a chur ceart. Tha mi an dòchas gun dearg i àir an sgrìobhadh agam a leughadh. Chuir mi diachainn gu leòir oirre as na sgrìobh mi huice mu dheireadh. 'S math fhéin na pinn a chuir i hugam. Tha mi an dòchas gun tig an dealbh aig Mgr. Seòrus hugam gun a bhith dol air seachran sìos rathad nam Fadhlaidhean gu Mgr. Alasdair Dubhghallach. 'S cinnteach gun gabh e mar sin ma sgrìobhadh *Rev. McDougall* air an taobh a muigh aige 'ga sheòladh hugam.

Bha i bial ri seachd uairean an nochd mun tàinig oirnn solas a lasadh. Cuiridh mi uidhreachd mhór as an fhad a tha tighinn as a' latha—céum fada foghainnteach a' ghiomanaich a' dol ris a h-uile latha, mar a bha 'n sean-duine aig an robh beachd air a h-uile rud ag ràdh:—

Mar ghiomanach a' dìreadh sléibh'
Feasgar éibhinn earraich.

Cha tàinig a bheag dha'n éibhneas fhathast mura teann e ri tighinn a nis fhéin. Is math dùil a bhith ris, agus is math a mhisneach do dhuine fios a bhith aige gum beil a' chuid as miosa seachad.

Dh' fhan am Mgr. Sgoil 's a phiuthair greis air chéilidh eadar 8 is 10 uairean.



Eaglais Mhgr. Ailein.

(Le cead P. J. W. Kilpatrick)